

全華叢書



全華策書



胡仲子集卷第九

明胡翰撰

郡後學胡鳳丹月樵校梓

謝翱傳

謝翱字皋羽建寧人也家故羸於財父鑰居喪哀毀人稱其孝宋咸淳初翱試進士不第慨然求諸古以文章名家元兵取宋宋相文天祥亡走江上逾海至閩檄州郡大舉勤王之師翱傾家貲率鄉兵數百人赴難遂參軍事天祥轉戰閩廣至潮陽被執翱匿民間流離久之間行抵勾越勾越多閩閩故大族而王

監簿諸人方延致游士日以賦詠相娛樂翺時出所
長諸公見者皆自以爲不及不知其爲天祥客也然
終不自明且念久不去人將虞我矣乃去而之越之
南鄙依浦陽江方鳳時永康吳思齊亦依鳳居三人
無變志又皆高年遂俱客吳氏里中得其餘日以自
適一不問當世事翺嘗上會稽循山左右窺祐思諸
陵西走吳會東入鄞過蛟門臨大海所至歔流涕
晚愛睦州山水浮七里瀨登嚴光釣臺北向舉酒以
竹如意擊石歌曰魂歸來兮何極魂去兮關水黑化

爲朱鳥兮有噉焉食歌已失聲哭人莫詰其誰何唯
鳳與思齊深悲之初江端友呂居仁朱翌辟地白雲
源源故方干所居在釣臺之南翺率其徒游焉願卽
此爲葬地作許劍錄及翺居錢唐病革語其妻劉曰
我死必以骨歸方鳳葬我許劍之地鳳聞訃訖如其
言鳳字韶卿由太學生授容州教授治毛氏詩陳宜
中當國禮下之命其二子大登小登受業焉同郡黃
潛柳貫皆出其門好獎拔士有一善未嘗不與之進
思齊字子善其學本之外祖陳亮用蔭補官攝嘉興

丞數以書干宋臣用事者言賈似道母喪不宜賜鹵簿責文及翁顧忌爭不力猶不爭耳又言御史俞浙以論謝堂去職宰相附貴戚塞言路如朝廷何思齊雖有寒疾耳聾遇事不以富移不爲貧屈自號歸全子云

媯仲子曰翰少客浦陽望仙華寶掌諸山從搢紳學者問翺時事未嘗不喟然爲之太息於是訪其論著之文翺有晞髮集鳳有巖南集思齊有全歸集三家者惟翺集備焉其辭隱其旨微大要類其行事是時

元新有天下士大夫於宋事多諱書之鄞江任士林
稱翺善哭如唐衢豈其情哉豈其情哉

趙氏大墓表

洪武元年十月壬午趙氏先世之喪旣葬于金華縣
慶雲鄉青岡之七星原郡守高公昇題曰趙氏之大
墓其孫古愚於是具其族出世次所以發大而流遠
者請識而傳諸子孫初秦悼王在宋爲太祖太宗母
弟王第四子曰德雍是爲廣陵康簡王康簡生承亮
是爲樂平忠靖王忠靖生克愉魏國文思公文思生

叔茝內殿承制承制之子堅官宮使正奉大夫始自
汴徙家于衢則建炎再造也今其竈實中居昭穆之
首碩人田氏祔焉宮使生常熟縣丞諱公傳娶徐氏
卒葬于衢常熟生長溪縣丞諱彥鉷娶徐氏卒葬蘭
溪今其竈皆爲位而不遷長溪之子遂昌縣令諱盱
夫居穆之次其配徐氏祔焉遂昌無子以從兄憂夫
之子爲後諱時堯居昭之次其配徐氏祔焉是爲古
愚之高曾祖曾祖有子二人長諱若韶號退藏山人
娶陳氏何氏李氏則其大父也次諱若隆娶童氏則

從大父也又各居昭穆之次穆之右則祔以伯父諱
嗣淇嗣鴻者叔父諱嗣淵者嗣淵之配張氏如之昭
之左則祔以厥考諱嗣滋者厥妣葉氏如之考妣之
次則古愚之弟古怡及其嫂張氏祔焉八世合二十
喪皆獲從其窆竈尊尊也親親也所以昭有禮也禮
必本其所始所以昭有德也惟趙氏蟬聯累葉自汴
徙衢至長溪丞又徙于蘭溪至退藏公又徙于婺今
遂爲郡人翰同里閨嘗獲交退藏之門聽其二子之
議論未嘗不以前人藁痊爲疚遭時孔艱賁志而沒

亦惟後之人宜其圖之故古愚古怡古忱篤於孝友
不替其父命於十年之後既買地縣北婺女鄉奉以
襄事今又改葬茲土克邁前跡是爲有合於古者邦
墓族塋之義故翰書之非徒示其子孫亦以爲邦人
勸

胡義士墓表

永康之魁山有義士焉姓胡名元祚其先建寧人也
宋宣和中其遠祖志寧來茲邑遂長子孫至今居之
邑地西直婺東抵處處阻險而悍獷山谷之間竊發

弄兵積爲民患及元之季郡邑兵起環處之境皆盜
區也成將石抹升之督兵討之勢猶不戢至正乙未
縉雲萌溪之寇殷氏杜氏燄羣兇以利人入剽掠橫
殺不辜元祚慨然曰吾土皆王民吾雖力不能爲國
除賊獨忍鄉井罹其毒束手視之邪走白邑令爲防
禦計散家財集少壯之丁立保伍之法大書其旗爲
義兵寇偵之不敢輒犯詐遣其徒來降尋乃旁出抄
虜擣邑郭焚廬舍會官兵至元祚率眾助討之寇退
兵駐邑中頗恣睢元祚扣軍門白主帥出旗樹於鄉

約曰敢擾吾民者殺無赦士卒如約而元祚具酒肉
禮其至者如初鄉民安堵令嘉其能檄所部團結悉
如其法上其名于憲府憲府嘉之署曰義士胡某俾
與方允中合而拒賊賊畏之至者不敢越鯉溪而西
時太平呂原明軍方岩致書元祚曰東南當賊要衝
君以身障之能杜其不至乎曷若去難就易於計萬
全也元祚曰吾眾以義合將以排難存鄉里耳委而
去之豈吾志邪益厲眾固守聞賊至山砦之民受圍
者輒出兵援之歲丁酉正月賊寇武平合德元祚大

破之逐北數十里二月丙午戰于前倉又破之賊數戰不利明日迺盡勒其眾間道出方岩與呂原明戰岩下呂不利其屬孫伯純歿于陣又明日賊復至與元祚遇于占田元祚盡銳以戰顧謂允中曰賊眾我寡唯死鬪耳不可退而覆也自辰至午戰不利方允中呂伯川沒于陣元祚自分不獨生戰益力厲聲罵賊不旋踵死之至正十七年二月二十二日也邑令野速達聞其死輒泣曰吾爲天子命吏不能贏股肱効尺寸功而元祚起畎畝不費官一粟不取民一錢

合鄉兵而贍之屢與賊搏雖斃於蜂蟻之眾不少挫其氣吾屬媿之矣其可使君之志不白於當世乎具疏其事以聞報未下明年王師克婺城永康內附又十有一年朝廷修元史凡忠臣義士於法得立傳余欲取其事載之無以究極其詳又八年余至永康見其子裕問君所以致死裕哀形于色爲余言其先人之沒裕不能援而與之俱顧嘗圖其不朽有韓先生循仁之狀宋先生濂之銘在余讀而悲其不幸然未嘗不壯其爲人當寇發難時巨族寒畯男女扶攜走

道上以脫一旦之命不顧宗祏棄骨肉者里相比也
將吏畫地自守玩愒以養寇畏縮以爲持重不能展
手足者郡相望也計其人怖死不暇惡肯抗必死之
寇以不貲之軀而君亦何樂而爲之無乃輕用其身
哉天下大義蓋有重於身者人不察也叛逆之寇義
所不容也吾討之義不容已也不幸而死固其所也
君旣死而懷利計私者苟免宜若得志由今視之果
能保其祿位乎享其貴富乎就令有之泯焉無聞者
多矣若君之所樹立聞其風者莫不惜而慕之大義

之在人心如此百世之下有生氣矣君得年四十有八娶章氏繼趙氏子四人趙出也長卽裕次禊次祐次禔余旣多君之義又愛其子之能孝故撫其大節俾揭而表諸墓亦史氏之遺意云

何遁山墓誌銘

公諱鳳字天儀其先澤州晉城何氏唐會昌間澤州亂何氏南徙析其族辟地衢處婺三州而婺之著籍自淳始歷五代至宋其十一世孫有諱棣者是爲公之曾祖其別出之族若殿講文定公基司農卿夢祥

參政夢然皆以學術貴顯故棣雖不仕而蔚爲聞家
棣生焯於公爲祖焯生璧於公爲考璧娶應氏以淳
祐十年生公生二十五年而宋亡元有天下恥於折
節當世業醫藥爲人治疾不避風雨寒暑治之常若
不及無貴富貧賤必具善藥與之或不償其直置之
弗較所至人賴其濟元貞初北游燕趙用薦者授婺
州醫學教授轉江西醫學提舉公雖隨牒漫仕意漠
如也每風日清美則幅巾藜杖盤桓姻舊間長者事
之以禮少者接之以誠陳說前代典故談謔俚俗瞭